

橫
楊
札
記

卷一

卷二

卷三

卷四

卷五

卷六

卷七

卷八

卷九

卷十

卷十一

橫陽札記卷之四

錢塘吳承志纂

吳興劉承幹校

臣妾聚斂疏材

周禮天官太宰職八曰臣妾聚斂疏材鄭元注云臣妾男女貧賤之稱晉惠公卜懷公之生曰將生一男一女男爲人臣女爲人妾生而名其男曰圉女曰妾及懷公質於秦妾爲宦女焉疏材百草根實可食者疏不熟曰饅蒙按尙書費誓篇臣妾逋逃裴駙史記魯世家集解引鄭彼注云臣妾廝役之屬也廝役固是男女貧賤者

所爲然男女貧賤者未必卽爲廝役不可概以臣妾目之若專指爲人廝役者而言下注引鄭司農云閒民謂無事業者轉移爲人執事若今傭賃也臣妾又卽傭賃於閒民不能爲別且廝役雖執事猥鄙亦非專職疏材禮記月令篇山林藪澤有能取蔬食田獵禽獸者野虞教道之彼注云務收斂野物也草木之實爲蔬食蔬食與禽獸並任野民取獵又無別設之科等地官委人職曰掌斂野之賦斂薪芻凡疏材木材凡畜聚之物以式法共祭祀之薪蒸木材賓客共其芻薪喪紀共其薪蒸木材軍旅共其委積薪芻凡疏材疏材與木材對文似

并非月令所謂蔬食掌荼職曰徵野疏材之物以待邦
事邦事兼祭祀賓客喪紀更不當爲野食之供鄭說俱
非竊謂妄字誤也委人掌斂疏材委與妾形甚相似妄
本作委無疑臣當讀爲拒說文手部拒篆解云給也从
手臣聲拒臣同聲假借拒委謂給事委人采取襍具之
物者上七事皆正職此職兼綜委襍故別爲一目七職
中國圃藪牧俱有官地及官役百工嬪婦亦兼官民言
虞衡全掌在官惟其餘頌及於民此職必亦如之讀者
不知臣爲借字誤以正義釋之因誤委爲妾致與地官
諸職不能符合於本文亦觸沓難通矣疏材當爲粗材

委人於祭祀喪紀專其張事之材所需惟木故曰木材
軍旅取備繁多有木材亦有草材木材又有治版築造
攻具數等不專一事故曰凡疏材掌荼所徵專爲草材
不兼木材參合彼文所謂聚斂者可知也大司徒職頒
職事十有二于邦國都鄙三曰作材八曰斂材作與斂
分列爲二卽以正襍別之間師職任衡以山事貢其物
任虞以澤事貢其物不別出委事舉正以包襍尋求全
書條理委人本以掌斂山澤襍材立名亦昭然明白矣

四曰藪牧

周禮天官太宰職四曰藪牧養蕃鳥獸鄭元注云澤無

水曰藪牧牧田在遠郊皆畜牧之地蒙按藪與牧義不相屬藪當爲芻之借文考工記輪人職以其圍之防稍其藪鄭彼注引鄭司農云藪讀爲蜂藪之藪元謂蜂藪者猶言趨也藪者眾輻之所趨也藪與趨聲近假借芻趨同聲芻借作藪卽其例芻牧見夏官圉人職孟子公孫丑篇曰今有受人之牛羊而爲之牧者則必爲之求牧與芻矣牧必以芻故通曰芻牧注說非芻牧通獸人及地官牧人牛人充人夏官羊人校人牧師廋人圉師服不氏射鳥氏羅氏掌畜秋官犬人蠻隸閩隸夷隸貉隸諸職所掌而言其地兼遠近不專在郊

生材學藝世事服事

周禮地官大司徒職九曰生材十曰學藝十有一曰世事十有二曰服事鄭元注曰鄭司農云生材謂間民無常職轉移執事學藝謂學道藝世事謂以世事教能則民不失職服事謂爲公家服事者元謂生材謂養竹木者蒙按上文稼穡樹藝作材阜蕃飭材通財化材斂材八事與天官太宰職三農生九穀園圃毓草木虞衡作山澤之材數牧養蕃鳥獸百工飭化八材商賈阜通貨賄嬪婦化治絲枲臣妾聚斂疏材八職純同此四事自通指間民無常職轉移執事而言彼具總目此其分目

也先鄭依據彼文得其理解又別出下三事專以上一事屬之執偏當全致歧失不可以合復以此世事附合於上世事更成糾誤上世事是官所施十有二教之一此世事是民所職十有二事之一二者分別劃然豈能通併後鄭別自爲說以生材爲養竹木者尤非竊謂生材之材當讀爲才生之言養也太宰職生以馭其福彼注云生猶養也是其義生才謂養育未成之才保氏職曰養國子以道乃教之六藝乃教之六儀國子之教以養爲主術序黨庠家塾之學者俱在所養可知養成則爲賢爲能興之於賓以任國事未成非其科等是以列

於間民之首學藝謂偏成一藝者六藝當兼通偏則爲
技揚子法言君子篇通天地而不通人曰伎李軌注云
伎藝偏能伎藝卽技藝養官敘官曰凡以神士者無數
以其藝爲之貴賤之等藝謂所執之技巫醫星卜皆藝
之一事禮樂射御書數之支流餘業也學當讀爲效黃
榦續儀禮經傳通解祭義篇引尙書大傳洛誥傳云書
曰乃女其悉自學功學效也學與效通效藝卽效技技
之上者亦以能入官下者無職以所業游食於民間謂
之技士故列於生升之次世乃貰之省借說文貝部貰
篆解云貸也从貝世聲貰事謂富民無業而有財以貰

貸取息於人者泉府職凡民之貸者與其有司辨而授之以國服爲之息官貰於民謂之貸民自爲貸謂之貰兩名古微有別史記貨殖傳范蠡之陶爲朱公乃治產積居與時逐于贛廢著鬻財於曹魯之間積居與辭逐廢著鬻財皆是以貰爲事其人非商賈不隸市籍是以又列於次服事則貧民不能自食服役於人者公家之徒隸民戶之賃傭俱是其操業爲最下故置於末太宰職注引鄭司農云間民謂無事業者轉移爲人執事若今傭賃也傭賃止四事之一非間民全執此役先鄭失此義因并失彼義四事通包良賤貧富閭師職凡無職

者出夫布無職有上三科夫布之征亦不爲苛虐此文通彼文自略然可通矣

宅田官田

周禮地官載師職以宅田士田賈田任近郊之地以官田牛田賞田牧田任遠郊之地以公邑之田任甸地以家邑之田任稍地以小都之田任縣地以大都之田任畛地鄭注曰鄭司農云民宅曰宅宅田者以備益多也士田者士大夫之子得而耕之田也賈田者吏爲縣官賣財與之田官田者公家之所耕田牛田者以養公家之牛賞田者賞賜之田牧田者牧六畜之田元謂宅田

致仕者之家所受田也士相見禮曰宅者在邦則曰市井之臣在野則曰草莽之臣士讀爲仕仕者亦受田所謂圭田也孟子曰卿以下必有圭田圭田五十畝賈田在市賈人其家所受田也官田庶人在官者其家所受田也牛田牧田畜牧者之家所受田也公邑謂六遂餘地天子使大夫治之自此以外皆然家邑大夫之采地小都卿之采地大都公之采地王子弟所食邑也蒙按二鄭說宅田士田賈田官田牛田牧田義各不同據牛人職文所養有兵車之牛其數必多牧地亦必廣牛田當如先鄭說蓋因牛人所牧之地以旁近之田稅予之

令自徵以給眾役也牧田當爲贍給牧師之田夏官牧師職曰掌牧地皆有厲禁而頒之孟春焚牧中春通淫掌其政令校人職曰夏祭先牧頒馬攻特等馭夫之祿宮中之稍食校人所掌之馬皆養於牧役食如牛田因郊外曰牧名出於此故曰牧田士田賈田以家邑小都大都之田爲大夫以上采地推之當爲上士中士下士之祿田府史未有職亦以士人爲之其祿食當通取給於是賈田爲資給襍役之田敘官曰泉府賈八人徒六十人天官夏官秋官敘官庖人太府玉府職幣典婦功典絲馬質羊人巫馬犬人並有賈次胥徒之上襍役賈

居首故以賈爲名田皆授民耕種祿食各分取資之處
所以標別眾目後鄭說俱非先鄭亦止得其半歧失
其半宅田官田二鄭之說並誤下文曰近郊十一遠郊
二十而三甸稍縣都皆無過十二遠郊以外與近郊稅
不同等其授田之法亦必不同二田乃標舉其綱非目
也宅田謂正法所授百晦之田遂人職曰上地夫一廛
曰百晦菜五十晦餘夫亦如之中地夫一廛田百晦菜
百晦餘夫亦如之下地夫一廛田百晦菜二百晦餘夫
亦如之鄭彼注引鄭司農云戶計一夫一婦而賦之田
廛居也揚子雲有田一廛謂百晦之居也廛宅同義此

文之宅卽彼文之廛田以廛授無所受之廛卽無所受之田故通謂之宅田官田則正授以外兼有加畝之別田也遂人職曰以疆予任眊疆予謂民有餘力復予之田卽是加田官當讀爲間古間與官聲近字通詩鄭風溱洧篇方秉簡兮漢書地理志引作方秉管兮是其證間田謂正授不盡之田禮記王制篇州建百里之國三十七十里之國六十五里之國百有二十凡二百一十國名山大澤不以封其餘以爲附庸閒田彼閒田謂封授不盡之田與此義同田法百畝爲正遠郊以外地廣而人少宅不能增益田數餘於廛數按法以授閒曠

甚多加授須別爲名故通目之曰閒田宅田無磽薄之地稅法通以百晦徵其什一閒田有上地菜五十晦中地菜百晦下地菜二百晦三等稅法減中下以上地爲定菜五十晦并正授之田爲百五十晦晦數加宅田之半故稅數亦加半爲二十而三兩法多寡殊科而輕重不異先鄭失其理解於下句遂致無說可通後鄭強附役法注云周稅輕近而重遠近者多役也役與稅截然兩事豈可通合遂人職凡事致野役遠地役法亦非有遺近郊所多不過零襍小役均配四境歲不能多踰旬日加稅至終歲所輸之半焉得謂非苛斂此皆因誤讀